

桂平縣志

卷四  
卷四七  
一至

桂平縣志卷四十一

紀人

楊秀清蕭朝貴韋昌輝石達開秦日綱黃玉崑陳玉成  
諸人傳

昔邑先輩黃少瀛先生脩潯州府志編洪秀全起事始末惻然念及本鄉爲發難之區當日死事之衆日久尙無血食爲立忠義祠載其事於志中然則洪秀全者固先烈仇讎爲老師宿儒之所不避彼楊蕭諸人非與之同盟咀聯臂指者乎今爲傳之何也是蓋有說焉史例大事必書人無善惡苟爲特出則爲立傳而往日志家涉筆多忌且同在一鄉褒貶並

桂平縣志卷四一

紀人 楊蕭諸人傳

一

粵東編譯公司承印

施易滋爭黨故揚善而隱惡事非得已若夫楊蕭諸人所爲震驚全國讀書載筆之士欲聞其事者如飢如渴加以事成旣往後胤湮微子孫已無毀廟之親宗姓不在諱名之列又何所忌而隱之若嫌其人與先烈爲敵不宜兼載抑又不然楚申包胥語伍員曰子能覆楚我能興楚人各有志何能相強秦有陳涉起事纔數月而馬遷作史列之世家猶曰非漢敵也項羽親與高祖對壘而爲作本紀遷乃漢臣例且如斯今卽清帝垂裳如故固不能執卷而興詔獄卽先烈有知亦必不因是而悔其昔日之多事耳李秀成破杭州獲滿洲人而優待之曰各扶一君兩不得已其言至允况斯篇之作其

中固多不諱之辭哉

楊秀清居宣二里平隘山夙有異志貧甚以燒炭爲生而廬中常欸接俠徒以賣炭錢負竹筒入市沽酒歸而饗客道上時引聲浩歌有掉臂天門之概清道光二十六年廣東花縣人洪秀全與其同邑馮雲山來紫荆山倡拜上帝會秀清與蕭朝貴韋昌輝石達開次第入會相結爲兄弟秀清性機警喜用權智自謂夢中能知未來事一日語人曰吾昨夢見某地有金聞者如言往果得金驚爲神異其實秀清預藏也又嘗誦人陰私摘發之白云從夢中窺見其譎如此秀全假稱天父秀清爲證其說佯爲天父附身作語挾秀全跪而受杖

桂平縣志卷四一

紀人 楊蕭諸人傳

二一

粵東編譯公司承印

己有不韙亦自伏地令人杖之不稍貸以是朝貴等篤信之各往諸郡邑引人入會從者頗衆三十年六月附近紫荆山之金田與厚祿里白沙平南花洲貴縣石龍及六川博白同日起事時秀全方匿花洲胡以眺家秀清率衆往迎回金田移屯武宣東鄉招集徒衆得貴縣林鳳祥揭陽羅大綱衡山洪大全等同返金田先後與清兵戰於大黃江新墟武宣東鄉象州之間已詳前紀事下編咸豐元年閏八月初一日洪軍陷永安州建號太平天國分封各王秀全自爲天王秀清東王朝貴西王雲山南王昌輝北王與天王並爲五王五王中運籌帷幄咸仰雲山秀清智計不亞雲山復能臨事堅忍

以術籠絡部曲有進無退清朝既失永安清兵圍攻甚力兩方交綏時永安城上礮臺望樓爲風雷燬破洪軍中多懷散志秀清獨屹然鼓牢羣伍灰而復熾二年二月激衆潰圍東出北趨桂林秀清料平樂昭平各處必有清兵堵截避從小路經牛角峒山出馬嶺六塘高田逕撲省城與清兵相持月餘不下棄去東北陷全州時雲山中礮死軍中大事一切取決於秀清秀清遂隨秀全趨湖南陷道州桂陽郴州朝貴在長沙前敵戰死秀清聞報自郴州隨秀全馳師抵長沙城與清兵戰擊斃清游擊蕭逢春都司姬聖脉卒以長沙不下復棄去夜渡湘水防清兵尾追故分小股向南行清兵以爲回

桂平縣志卷四一

紀人 楊蕭諸人傳

三

粵東編譯公司承印

犯湘潭也悉向南援秀清遂令大股西入甯鄉再北至益陽由臨資口渡洞庭湖東北薄岳州岳州三面環水陡絕峻險難攻而秀清自入湖南後沿途引土寇入會呼爲兄弟凡自廣西來者爲舊兄弟自湖南投者爲新兄弟衆悅之新舊歸者十萬爭爲効死復得岳州鄉勇導引入城城遂陷舊存康熙間吳三桂軍械盡爲秀全所有聲勢大振遂奪民舟五千渡以入湖北陷漢陽府順勢攻武昌武昌枕山臨江頗占形勢秀清令林鳳祥羅大綱李開芳等立壘四面環攻別從文昌門穴地轟城遂陷之時二年十二月初四也武昌陷後洪軍遂畧沿江郡縣東下江南以三年二月陷金陵秀全初與

秀清定計欲分黨守江南而統全衆由淮安北趨適有老舟子言北路水慳糧乏遇困莫解今長江天險舟師萬千不可棄也秀清聽其說遣林鳳祥羅大綱李開芳曾立昌吳汝孝等率衆東下於二月二十一日陷鎮江府二十三日陷揚州府分據浦口瓜州各要隘徧立土壘以阻清朝南北路之師迺定金陵爲太平天國國都又名天京秀全庸闇不能治事秀清爲之整飭軍伍立法安民男女異居百工異肆設官稽察城門挾物出者許手携不許負荷男女不許交談乃至母子亦不許並言下令凡官兵敢入民房者殺無赦當是時清朝欽差大臣向榮自湖北追至金陵結營城東孝陵衛是爲

江南大營琦善亦率直隸陝西黑龍江馬步諸軍自河南至揚州與直隸提督陳金綬內閣學士勝保分營城外是爲江北大營上江則有湖北按察使江忠源率師東下而曾國藩亦奉旨練兵於衡湘秀全僅有江甯鎮江揚州三府其自金田起事以來沿路所攻克郡縣皆棄而不守盡爲清軍收復秀清乃定計進取四月遣林鳳祥率二十一軍軍數千人由金陵進發爲取北京計是月鳳祥入安徽踞淮關陷鳳陽勝保自揚州分兵躡追秀清復遣吉文元自江浦入安徽與鳳祥會於亳州北入河南五月鳳祥等陷歸德府西撲開封不克潛渡河北圍懷慶府清大臣訥爾經額將軍托明阿山東

巡撫李德與勝保各率大兵集擊七月文元戰死秀清遣朱錫珪許宗揚脅衆二萬往援鳳祥令入山西趨直隸九月鳳祥敗於天津退踞靜海縣復退入河間府踞阜城縣清親王僧格林沁與勝保之兵由靜海來合擊四年三月秀清遣曾立昌由豐工渡河入山東陷臨清州以鮮阜城圍四月爲勝保分師克復餘衆退踞曹縣被殲僧格林沁亦攻克阜城鳳祥逃連州被擒餘衆南遁山東踞高唐復敗入馮家屯俱戰歿秀清北征之計至是全敗而清朝江北大營受此牽制僅克揚州旋得旋失西不能入安徽南不能復瓜州如是者屢年先是秀清於三年五月遣賴漢英石祥貞上江西攻九江

湖口進圍南昌爲江忠源東下之師所截不克更南入內地勾土寇圍吉安府復爲夏廷樾羅澤南郭嵩燾等自湘來援之師所敗漢英等退出九江湖口會琦善圍揚州急秀清調漢英回援十月秦日綱破桐舒二城東攻廬州江忠源自湖北來援登陴助守秀清遣胡以晄率衆十萬助圍遂破廬州忠源投古塘死於是皖北東而和含西而六安盡歸洪氏方秀清調漢英自九江回援揚州時餘黨上湖北據黃州四年正月擊清朝新任總督吳文鎔臬司唐樹義落水身死秀清欲乘勢陷全楚通兩粵急遣石祥貞舍武昌而上陷岳州湘陰湘潭黃州諸黨亦連陷漢陽德安安陸西侵荆襄洪軍勢

大振自是而後勝負無常洪軍所陷城邑入於清者亦復入於洪而金田起事首要如達開昌輝日綱輩皆集駐上江奮戰陳玉成亦漸著戰績自三年迄五年間金陵西顧稍紓惟江南大營逼近朝陽門外復有張國樑善戰爲洪氏憂秀清歷年踞城與敵城外如九洑洲七里洲中關下關雨花臺紫金山秣陵關江東橋上方橋等處秀清皆築壘如城掘濠如江爲堅不可拔之基三年三月向榮進兵擊通濟門以噴筒火箭直射城中秀清乘夜率衆登城開礮禦之十一月向榮派兵圍鎮江秀清令安徽甯國灣沚之衆由蕪湖南泊高淳湖伺東壩以救鎮江不克四年七月向榮抽大營兵東征上

海秀清偵大營力薄密令蕪湖衆下圖東壩向榮覺而拒之二十五日又分股撲七橋甕不克閏七月向榮克復安徽太平府秀清復陷之五年向榮軍進掃金陵上三山壘重收太平府克復蕪湖破九洑洲壘江蘇巡撫吉爾杭復轟塌鎮江郡城金陵大困秀清於是令李秀成與陳玉成救鎮江順破揚州功成班師回秀清拒之曰非破孝陵衛向榮軍不許入城軍衆憤甚秀成乃屯兵燕子磯自入請命緩戰秀清大怒曰違命者斬秀成遂出與張國樑戰於猺化門石達開復引軍來助遂陷江南大營營中器械盡爲秀清等所有向榮與張國樑退駐丹陽秀清令秀成追之並下丹陽向榮自縊死

時六年七月也初秀全攻長沙不下取玉造璽稱爲天賜以籠其衆令呼萬歲及抵金陵衆復呼秀清九千歲已死馮雲山呼七千歲韋昌輝六千歲祝詞至五千歲而止石達開與焉秦日綱等呼王千歲而已秀清位高權重而恣每瘡視秀全秀全居清江甯舊督署閉令深藏黨中莫覲秀全面者數年江南大營旣陷秀清陰有自立意令衆稱萬歲衆稍難之秀清自請於秀全答曰弟稱萬歲甚善然則何以稱我秀清曰可尊兄爲萬萬歲諸不歉於秀清者密助秀全召韋昌輝石達開歸密圖之昌輝先至入賀戒備以往秀清止而觴之飲次抽刃刺秀清洞胸割而之烹盡殺其黨秀清旣死金陵

大事盡爲洪氏親族操持人心漸渙雖有李秀成陳玉成踵起亦不久而亡矣秀清在軍中以能事稱軍中每誦祝畢必齊呼曰殺盡妖魔和聲如雷以顯其衆又有術名發猖陰以猛烈藥預置酒中臨戰誦咒殺雞滴血入酒各予一杯云飲此即有天父天兄佑助足避刀劍接仗時藥發焦躁奮不顧身又於槍礮烟迷之際令後隊各脫紅黃短衣向空拋擲清兵遙見驚爲能飛黃文鎔戰敗黃州時全隊驚潰實由於此皆秀清之令也秀清令嚴而酷賴漢英白暉懷黃再興等或囚或戮已附記於紀事下編復有曾姓者洪氏指揮官也隨曾立昌北征立昌在山東戰敗溺曹縣黃河中曾姓者逃回

江甯秀清大怒以紙纏頂至踵倒植塗膏燃死之名點天燈  
黨中由是多側目秀清昌輝達開亦心滋不悅而未敢言秀  
清卒以此敗當昌輝之入賀也秀清妾傅氏先曰進言云聞  
北王來賀而引兵入城恐有叵測大王當防之秀清不聽遂  
死傅氏殉焉或云易服而遁秀清原名嗣龍秀全代易名秀  
清一說秀清湖南衡山人也父大朋故教匪誅死秀清徙廣  
東居嘉應州後遷居桂平大黃江云

蕭朝貴原籍武宣移居於邑之宣二里平隘山與楊秀清比  
鄰號又正軍師西王性悍而癡信上帝教聞秀清言以爲真  
有天父也咸豐元年六月洪秀全等被圍新墟竊由小徑上

思旺途遇向榮軍營數十座朝貴與馮雲山合力攻破之秀  
全等始獲趨永安道經藤縣大黎里朝貴遍括諸村服食以  
供兵用居民多避之朝貴下令慰之曰拜上帝者勿逃臨行  
盡燬從者家欲其無所戀而甘爲之死洪黨所爲率如此全  
州陷時秀全等奪民舟東下江忠源督湘勇於蓑衣渡扼之  
遂舍舟登陸各黨分途攻江華甯遠嘉禾桂陽郴州朝貴誦  
長沙民房未拆且兵單可襲乃率死隊由永興茶陵醴陵北  
趨長沙踞城南及小西門民房並占妙高峯鰲山廟等高阜  
爲壘時欽差大臣賽尙阿駐永州湖廣總督程喬采駐衡州  
俱逡巡不敢赴城內巡撫駱秉璋獎士民登陴固守總兵和

春常祿李瑞德亮及江忠源倍道追至與朝貴相持二年八月清詔奪賽尙阿程喬采職以徐廣縉代促向榮赴援榮至朝貴攻益急清軍殪之秀全等馳至得屍葬以王禮妻洪宣嬌羅祿洞人秀全以其同姓稱爲妹故他書以朝貴爲女弟夫也子有和襲西王死亂兵中

韋昌輝初名政居宣二里金田村家富爲其父元介入粟爲國學生榜其門曰登仕郎鄉中生員梁嘉竣大黃江巡檢黃基拘治之賄數百金而後已日欲尋仇初馮雲山教學於紫荆山大冲村倡上帝會被執東主曾玉珩斂諸業炭者錢營救之雲山被解回籍中途以上帝教說解差釋回金田住昌

輝家誘使入會昌輝資助之咸豐元年六月洪秀全自象州退駐武宣東鄉舊營分屯新墟清兵駐崇姜里向東進擊十一月昌輝率衆二千西趨與李孟羣等戰於盤龍渡已詳紀事下編秀全敗於新墟趨永安州各軍由水而進昌輝與蕭朝貴引衆由陸而至永安州下建國號封昌輝爲西王及清兵擒洪大全解桂林昌輝率衆奮追之四年二月楊秀清遣石祥貞等上湖北會漢黃各黨舍武昌以陷岳州而昌輝獨率衆踞武漢西陷德安各府六年七月清參將普承堯同知吳坤修曾國華知縣劉騰鴻合攻瑞州瑞州居江湘之衝有南北二城分踞兩岸曾國藩撥兵勇六千人助戰拔南城昌

輝自臨江赴援至北城勁悍前驅驟挑戰清兵始堅壁不動  
忍待旬餘乃從北岸渡兵抄其後南城勝兵角其前僅克之  
而諸軍攻北城卒未下昌輝才畧器度不逮石達開而悍忍  
過之兩人始甚相善陷金陵時兩人同爲前敵其後上江贛  
楚諸戰亦互相携援秀全俱重之然均下秀清一等秀清啓  
事稱弟立兩人則稱臣跪勾當一是黨衆先白兩人謂之稟  
報兩人揣可行而轉達秀清則爲稟奏兩人諂事秀清陰實  
圖之秀清欲呼萬歲昌輝自皖回手刃之達開後至責其殲  
東黨太酷昌輝欲併圖之達開縋城遁昌輝悉誅其妻子秀  
全怒令衆攻其府昌輝渡江逸去途遇東黨執送秀全族誅

之石達開居厚祿里白沙村父老猶能道其戶址証以李秀  
成口供尤信他書定爲貴縣人者非是貴縣志云達開爲來  
人來人者非久居本土之謂其非貴縣人明矣達開少讀書  
受業於同里貢生陳捷元已學爲八比文頗善小楷曾充蒙  
江關書記後入上帝會與洪秀全等起事於金田陷永安州  
時受封翼王咸豐三年正月秀全等舍武昌東赴江南達開  
領水軍攻安慶太平蕪湖諸郡邑逕撲江甯下之其驍勇與  
蕭朝貴韋昌輝同倫而以恩信籠結其下則非蕭韋所能及  
金陵陷後自上安徽撫恤降民以其土人爲鄉官各授以職  
令按畝徵糧由民自供免滋兵擾金陵餉糈悉賴焉先是四

年冬曾國藩治師江西江西洪氏諸黨復上攻湖北以分其勢已而武昌告陷胡林翼等馳救不及國藩復令羅澤南率師五千自江西赴援當是時洪氏所恃以與楚軍敵者實惟達開五年九月澤南連克通城崇陽林翼方謀迎勞而達開率悍黨數萬自義甯掩至澤南力戰破之卒與林翼合軍洋樓以十月復蒲圻十一月復咸甯方引軍鼓行而北而達開遽率其黨回義甯連陷新昌瑞州臨江並令他股由湖南入江西陷安福分宜萬載與瑞州黨衆合陷袁州復分黨圍吉安畧萍鄉國藩坐困南昌勢日岌岌清廷議江西危急萬分請調澤南軍回援文宗不許惟詔湖南巡撫駱秉章募兵助

之秉章遣劉長佑蘭啓江率五千人往援未至而萍鄉吉安撫州又相繼爲達開所陷國藩疲於肆應踈伏江西一年有餘當是時胡林翼等困武昌志在必復達開亦以武昌不保則金陵危六年五月率衆抵武昌縣之葛店以援武昌林翼濬濠於青山嘴由大江通南岸嘴以拒之達開退至樊口六月復集衆萬餘由蘄水廣濟黃岡抵漢鎮與清將軍都興阿等大戰清兵獲勝而武漢卒久攻未能下其後韋昌輝在金陵屠楊秀清黨達開急自湖北回救清兵始復武漢洪氏自得金陵閱四年諸將戰績無與達開比者始達開頗忠於洪氏及楊韋旣死親佞用事遂遁去不與洪氏通並改易軍制

官有元帥統戎佐旂總制將軍提審通傳諸名目以別於洪氏舊制已而突入浙江福建江西以擾湖南聲勢震盪巡撫駱秉璋多調宿將與力角於洞庭衡山以南僅使出境達開乃還齟廣西諸郡仍繞湖南北徑窺四川邊境退入滇黔之交奔突萬餘里蹂躪百數城厥性慣走邊地避實蹈瑕每爲官軍所蹙則跽伏山中倏伺形便飄然遠颺自謂生長嶺嶠善陟奇險躡幽徑恣其出沒使清兵震貽失措莫之能防然亦卒以此禽滅同治二年三月由雲南犯四川使其先鋒賴裕新率兵四萬由甯遠冒險深入裕新敗死餘衆窮日夜力兼行飄忽如風雨闌入陝西欲引官軍追之北上俾南路空

桂平縣志卷四一

紀人 楊肅諸人傳

一一一

粵東編譯公司承印

虛達開遂自率大隊渡金沙江將北窺大渡河大渡河爲西南巨塹由越雋冕甯大小兩路而來必走安慶壩及萬工汛緣河二百餘里有渡口十三處若西繞土司轄境皆仄徑可北越松林小河由上游瀘定橋及化坪林徑渡入薄天全雅州時駱秉璋總督四川劉蓉爲布政使綜理營務贊畫軍謀偵知松林地諸土司受達開賂將讓路秉璋乃調總兵唐友耕一軍專防安慶壩至萬工汛檄知府蔡步鐘率雅州勁勇馳往助之檄諸軍陸續馳扼雅州榮經及化坪林以張聲援檄松林地土千戶王應元率所部土兵駐守松林小河檄叩部土司嶺承恩統夷兵截斷越雋大路逼石黨入土司境伺

入險卽抄其後路使不得退先重賂嶺承恩王應元夷兵土  
兵並許獲賊財物悉償之布置既定達開率衆可四萬繞越  
雋冕甯前進知越雋諸要隘嚴兵以待果由小徑趨王應元  
所轄之紫打地其旁兩山壁立隘日險仄易進難退前阻大  
渡河左阻松林河右阻老鴉漩河達開以土司之納其賂也  
夷然信之長驅入險是時大渡河北岸尙無清兵達開使其  
下造船筏速渡渡者已萬餘人會日暮忽傳令退還南岸謂  
其下曰我生平行軍謹慎今師渡未及半倘清兵卒至此危  
道也不如俟明日畢渡遲明遣探視忽見大渡河及松林河  
水陡高數丈達開謂山水暴發一二日可平也當少俟之越

二日水勢稍平忽見清兵已到北岸用槍礮隔水擊有死者  
達開欲退出險遣其黨回視隘口則土司已斷千年古木六  
大幹偃於地以塞路且有夷兵把守欲索兩旁小徑則皆千  
仞絕壁無可攀躋衆游弋大渡河松林河南岸晝夜伺間衝  
突皆被清兵土兵擊退死亡者萬餘人嶺承恩復由後路抄  
入攻奪馬鞍山營絕其糧道夷兵或三五爲輩伏險狙擊或  
自山巔隕木石清兵亦不時渡河兜擊達開進退無路約書  
於矢隔河射入王應元營啗以重利求讓路應元不應復以  
利誘嶺承恩承恩攻之益急達開徇於衆曰吾起兵以來十  
四年矣跋險阻濟江湖如履平地雖遭時艱難亦常蹙而復

奮轉敗爲功若有天祐今不幸受土司廷陷入絕地重煩諸君血戰出險毋徒束手受縛爲天下笑則諸君之賜厚矣因泣稽顙衆皆泣稽顙尅日加造竹筏誓於死中求生四月癸巳夜達開盡斬嚮導二百餘人祭旂率衆分撲大渡河松林河每數十人乘一筏人以擋牌蔽身皆披髮銜刃挺矛植立衆筏同時齊奮爲清兵土兵槍礮所擊悉隨驚湍飄沒浮尸如羣鶩蔽流而下達開在圍中匝月糗糧旣罄殺馬而食繼啖桑葉草根皆盡清兵與承恩應元四面兜擊直入紫打地盡燬其營達開喪輜重率餘黨七八千人奔至老鴉漩復爲夷兵所阻妻妾五人携其二子自沉於河達開望見清兵暨

投誠免死大旂乃携一子及宰輔等三人與其餘黨呼曰石達開降嶺承恩等羈之營中訊其餘黨之旄倪及脅從者逾四千人分途遣散其年老二千餘人唐友耕派營分駐彈壓五月丙午朔達開等五人過河至唐友耕營中越二日解送成都明日清兵夜以火箭爲號會合夷兵圍擊達開官二百餘人悍卒二千餘人殲焉達開到成都對簿有司訊其前後抗官軍事甚悉口如懸河應答不窮自稱年三十三於當世諸將負盛名者皆加貶辭惟謂曾國藩雖不以善戰名而能識拔賢將規畫精嚴無間可尋大帥如是實起事以來所未覩也乙卯礮達開於成都市是役也達開不自入絕地則不

得滅即入絕地而無夷兵四面兜擊亦不得滅然使諸土司中始無有受賄縱賊之人以達開之審於行軍亦決不肯竟入絕地也知土司之隱情而善用之則視乎當事者之籌畧矣至達開臨渡而山水忽發又似天意云 祥貞達開族人戰死城陵磯畧見楊秀清傳

秦日綱一名日昌居厚祿里祝多塘村故貴縣逐勇也陷永安州時洪秀全令日綱守水竇村以抗清兵與蕭朝貴均爲驍將朝貴死於長沙日綱獨當一面楚以北尤著驍猛旋攻九江安慶廬州諸屬邑咸豐四年清兵克復武漢石鳳魁退竄田家鎮將有他志日綱馳救而密啓楊秀清收其權尤爲

桂平縣志卷四一

紀人 楊蕭諸人傳

一五

粵東編譯公司承印

秀全心腹任天官丞相封燕王後韋楊黨相屠日綱死亂刃中

黃玉崑素健訟喜交衙署中人馮雲山逮桂平獄玉崑營脫之有女美達開妻焉咸豐二年攻長沙爲前隊清兵輒避其鋒三年二月江甯陷玉崑矯詔安民甚信於楊秀清侯以下無與抗者一日偶失秀清意予杖羞忿投水羅苾芬援之得免苾芬封地官又正丞相爲韋昌輝司會計韋死坐黨誅陳玉成居宣一里尋線村世稱四眼狗原名文丕秀全爲易名玉成玉成自幼讀書習制藝應童子試道考已招覆卒不售洪楊軍趨永安玉成投筆從之遇舊識輒揮手呼曰去去

毋遲以將相大業讓人也及抵金陵派任殿右十八指揮旋爲丞相封成天豫其後爲正掌率號英王咸豐四年二月隨石祥貞上攻湘潭而玉成志在武漢自領一隊入梁子湖達武昌踰城而上陷之並踞漢陽其年八月曾國藩克復武昌分師東下玉成糾衆西拒奔突於興國大冶蘄州黃梅廣濟之間屢折不懈六年春李秀成救鎮江與清提督張國樑蘇撫吉爾杭戰於湯頭相持不下玉成自瓜州上流獨乘一小舟逕衝金焦各山水營礮船入鎮江與吳汝孝率衆自城內攻出秀成自外攻入吉張軍大敗玉成遂與秀成破楊州陷江南大營其捨死苦戰矯捷先登率如此自江南營陷向榮

桂平縣志卷四一

紀人 楊肅諸人傳

一六

粵東編譯公司承印

病死提督和春自皖渡江繼任志圖攻復甯鎮先分軍攻桐城以阻敵援東起巢縣西達舒城南暨廬江連營百座勢逼甚七年春李秀成自桐檄甯國求玉成援玉成約秀成在桐備戰而自由池州樅陽往破無爲州下湯頭鎮破其營抄黃落河克巢縣廬江分軍守之卽引軍上淠河攻大關馳繞桐城絕清軍糧道與秀成內外夾攻清軍敗退舒城六安復陷玉成乃引兵而北破正陽關進攻壽州未下先是六年八月石達開因韋昌輝殺楊秀清事自湖北回金陵旋遠遁不與秀全通於是武漢諸郡縣盡爲湘軍收復洪氏驟失勢玉成以爲欲救金陵當保安慶保安慶當圖武漢武漢不可遽圖

當先圖黃州遂舍壽州南回宿松引兵而西上湖北先攻黃梅廣濟羅田蘄州不克復繞入河南由商城南攻麻城仍未得志乃返安徽值江南軍圍金陵甚急李秀成援師復敗於劉莊石橋局促全椒玉成遂由潛山過舒城東破廬州分軍攻梁固定遠而自下滁州與秀成合兵敗勝保之師於烏衣進次小店張國樑自江南來救復爲所敗玉成順勢下浦口與德興阿戰勝之進攻六合於是江南北路通而金陵之困解而黃梅宿松太湖潛山石牌桐城舒城一帶忽爲李續賓所破玉成聞報即至金陵請調秀成同往救之玉成領軍先行由巢縣進駐金牛包三河後以斷續賓歸路并分軍扼舒

城斷其後援八年十月初九日黎明續賓兵攻破玉成寨時濛露漫天續賓竟衝過玉成前玉成忽在後殺出秀成自白石山率軍夾攻大敗之續賓自縊於是清兵大震其明年二月玉成復攻廬州李孟羣與戰死之縱橫死咋所陷殺將最多胡林翼在上游與曾國藩協謀以安慶爲玉成分地其父母妻子在焉進窺安慶以致玉成玉成果悉銳西上是時曾胡爲清大帥左宗棠李鴻章皆在幕府合多隆阿鮑超諸將之力苦戰累月不利久乃克之會李秀成自浙江回玉成返旆而南與秀成合攻金陵大營陷之張國樑戰死時十年閏三月也於是國藩令乘勢急圍安慶曾國荃軍府城多隆阿

軍桐城李續宜軍青草塌鮑超爲游軍各軍俱萬人而以水師將楊岳斌扼駐濱江要隘集厚力張遠勢以待敵玉成自江南掃境至十月十四日與多李戰於挂車河大敗進薄圍軍不克玉成私念湖北江西爲楚軍根本衝其腹心必撤圍自救十一年正月從英霍間過西犯湖北連陷黃州德安隨州武漢襄樊皆大震令李世賢黃文金各挾全部轄徽饒信三府李秀成擁兵十餘萬圍撫州攻建昌進陷吉安瑞州以逼南昌九江皆援安慶也曾胡分遣諸軍且防且戰竟不撤圍軍玉成乃分黨踞所陷城自率健徒東援安慶多隆阿邀擊於練澤高河舖挂車河各處皆大敗之玉成之黨入自集

賢關築壘菱湖赤岡嶺以圍清軍曾軍憑濠拒之與鮑軍夾擊破其四壘玉成部下劉瑄林跳而逸水師擒磔之復展外濠環玉成十八壘於圍內俘斬無脫者瑄林驍將也玉成既失之勢遂不振復率楊輔清等分援安慶桐城晝夜疾鬪屢戰屢北黨衆崩潰其江西援衆則左宗棠以一軍特起鮑超亦以全軍馳往連與玉成遇於樂平景德鎮豐城河口各處皆大敗之玉成失勢東遁清軍遂拔安慶桐城徇瀕江郡縣皆下之李鴻章由青草塌回援湖北悉復所陷城玉成退入廬州拒守同治元年四月多隆阿軍克廬州玉成以皖鄂脅從數萬人投苗沛霖於下蔡欲與同拒清軍苗沛霖者以諸

生爲團練長劫其衆以叛清大帥勝保招降之猶持兩端意  
叵測受官於清朝不肯冠帶使其下呼己爲苗先生攻巡撫  
翁同書於壽明陷之殺豪族之不附己者清詔褫沛霖布政  
使銜川北兵備道將進兵討之沛霖乃復求撫於勝保亦陰  
通欸玉成玉成封爲平北王累書招玉成謂鳳穎二府形勝  
可踞諸鄉寨練丁皆習戰守足備徵調玉成信之旣去廬州  
多隆阿以勁騎蹂其後脅從敗散略盡惟餘親兵三千人沛  
霖出城迎玉成執禮甚恭見其親兵皆百戰精銳欲奪有之  
乃給玉成駐衆城外僅以百餘人入城沛霖分兵防守諸門  
多具酒食陰令部卒引玉成從者入帳酣飲而以盛饌饗玉

成伏兵齊起遂縻之送勝保軍中勝保欲降之不屈因述勝  
保敗狀以爲誚檻送北京行至延津清詔磔死

又有陳承鎔者亦宣一里人爲洪氏朝內官拜興國侯改佐  
天侯楊韋均倚任之同黨所至多奪財物而承鎔稍斂抑寡  
取